

Convenio de colaboración entre o Consello de Contas de Galicia e a Axencia para a modernización tecnolóxica de Galicia polo que se comparten infraestruturas, técnicas e servizos comúns que permitan a racionalización dos recursos TIC.

En Santiago de Compostela, a 8 de novembro de 2018

REUNIDOS

Dunha parte, o Sr. D. José A. Redondo López, na súa condición de conselleiro maior do Consello de Contas de Galicia, actuando ao abeiro das facultades que lle confire o artigo 8.4 apartado a) da Lei 6/1985, do 24 de xuño, e facultado polo Pleno do Consello de Contas de Galicia, na súa sesión do 6 de novembro de 2018, para subscribir o presente convenio administrativo.

Doutra parte, D.^a M^a del Mar Pereira Álvarez, en nome e representación da Axencia para a Modernización Tecnolóxica de Galicia, en virtude do disposto no Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus Estatutos, modificado polo Decreto 149/2014, do 20 de novembro.

Ambas as partes recoñécense mutuamente a súa competencia e capacidade legal para formalizar este convenio de colaboración, e para tales efectos

EXPOÑEN

Primeiro.- O Consello de Contas de Galicia é un órgano estatutario creado polo artigo 53.2 do Estatuto de Autonomía de Galicia, aprobado pola Lei orgánica 1/1981, do 6 de abril, que segundo dispón os artigos 4º e 5º bis da Lei 6/1985, do 24 de xuño,



reguladora da Institución, ten entre as súas funcións a fiscalización económica financeira do sector público de Galicia así como a prevención da corrupción. Pola súa banda o artigo 3º da Lei reguladora atribúelle competencia para todo o concernente ao goberno e réxime interior e ao persoal ao seu servizo.

No desenvolvemento das súas funcións relaciónase fundamentalmente coas entidades que compoñen o sector público pero tamén se relaciona con persoas físicas e xurídicas de carácter privado, ben cando exerce as súas competencias administrativas de xestión ou ben cando facilita o exercicio dos dereitos dos cidadáns en relación coas institucións públicas.

Para os efectos de dar cumprimento a obriga de relacionarse con entidades públicas ou cos cidadáns por medios electrónicos precisa de aplicacións e sistemas informáticos.

Segundo.- A Lei 16/2010, do 17 de decembro, de organización e funcionamento da Administración xeral e do sector público autonómico de Galicia, na súa disposición adicional terceira, autorizou a creación da Axencia para a Modernización Tecnolóxica de Galicia (en adiante Amtega).

O artigo 1 do Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus Estatutos, dispón a creación da Amtega como axencia pública autonómica que ten por obxecto a definición, desenvolvemento e execución dos instrumentos da política da Xunta de Galicia relativa ás tecnoloxías da información e comunicacións e a innovación e desenvolvemento tecnolóxico.



As competencias e funcións da Amtega segundo establece o artigo 6 dos seus estatutos son entre outras as de impulso, xestión e coordinación da Administración electrónica no ámbito da Xunta; a promoción e regulación da implantación da Administración electrónica no ámbito da Xunta, da súa relación coa cidadanía, e noutras organizacións de ámbito local e provincial en coordinación coas administracións provinciais e locais correspondentes; a interlocución e regulación de

Consello de Contas de Galicia
CONSELEIRO MAIOR

acordos con outras administración ou órganos en relación co emprego dos sistemas de información corporativos da Xunta de Galicia ou a interconexión con estes; o fomento da colaboración e da acción coordinada entre administracións públicas en materia das TIC e a promoción da inclusión e execución do despregamento das TIC no ámbito da prestación dos servizos públicos.

Terceiro.- A Lei 40/2015, do 1 de outubro, de Réxime Xurídico do Sector Público establece, no seu artigo 3, entre os principios xerais das Administracións Públicas, entre outros, a racionalización e axilidade dos procedementos administrativos e das actividades materiais de xestión, así como os de cooperación, colaboración e coordinación entre as Administracións Públicas.


Cuarto.- O Consello de Contas de Galicia e a Amtega, para garantir o mellor servizo aos intereses xerais, pretenden a formalización deste convenio de colaboración no desempeño das tarefas de interese público que lles corresponden, cada unha actuando no marco das súas competencias.



Consello de Contas de Galicia
CONSELLEIRO MAIOR

Así, o Consello de Contas de Galicia require a colaboración e asistencia instrumental da Amtega mediante a prestación do acceso ao Catálogo de sistemas dixitais a disposición dos órganos e entidades do sector público autonómico e os elementos tecnolóxicos necesarios para o funcionamento dixital. A Amtega, de acordo coa normativa expresada, ten competencia para esta colaboración e apoio instrumental ao Consello.

O presente convenio de colaboración, polo tanto, busca a eficiencia na prestación dos servizos públicos e a realización das tarefas de interese público que lles corresponden ás partes cos medios persoais, técnicos, materiais e de calquera outro tipo dos que dispón o sector público autonómico.



En virtude do exposto, as partes acordan outorgar este convenio de colaboración conforme ás seguintes

CLÁUSULAS

Primeira.- Obxecto

Este convenio ten por obxecto establecer as bases da colaboración entre o Consello de Contas de Galicia e a Amtega, para compartir infraestruturas, técnicas e servizos comúns que permitan a racionalización dos recursos TIC que se recollen no Anexo I: Catálogo de sistemas dixitais, a disposición dos órganos e entidades do sector público autonómico, necesarios para o funcionamento dixital.

Segunda.- Ámbito de aplicación

As aplicacións e sistemas para o funcionamento dixital son o conxunto de solucións e infraestruturas informáticas necesarias para a dispoñibilidade dos procesos e servizos dixitais, que estandarizan e solucionan partes ou a totalidade do procedemento dun servizo electrónico.

No "Anexo I Catálogo de sistemas dixitais" deste convenio recóllense os sistemas, aplicacións e infraestruturas habilitantes da administración dixital na que se poñen a disposición do Consello de Contas de Galicia os elementos tecnolóxicos necesarios para o funcionamento dixital, coa identificación das súas características técnicas e funcionais, así como a determinación do seu ámbito de utilización.

Mediante addenda poderanse incluír no Catálogo de sistemas dixitais novos sistemas, aplicacións e infraestruturas habilitantes da administración dixital.

Terceira.- Compromisos da Axencia de Modernización Tecnolóxica de Galicia

- Prestará os servizos en materia de tecnoloxías da información e das comunicacións de acordo co disposto no Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus Estatutos, modificado polo Decreto 149/2014, do 20 de novembro, o contrato plurianual de xestión da dita axencia e os correspondentes plans de acción anuais.

- Poñerá a disposición do Consello de Contas aquelas aplicacións ou sistemas, do Catálogo de sistemas dixitais, que pola súa situación tecnolóxica ou funcional estean en disposición de ser utilizadas, podendo este adherirse ao seu uso.

En función das condicións e situación das aplicacións ou sistemas, estes poderán poñerse a disposición en diversas modalidades: reutilización da aplicación; posta a disposición do seu uso; utilización compartida e aquelas outras que en cada momento poidan ser de interese, segundo se recolle no Anexo I a este convenio.

O nivel de prestación dos servizos e actuacións da Amtega levarase a cabo de acordo a un plan de acción anual, baixo a vixencia e de acordo co pertinente contrato plurianual de xestión da dita axencia.

- Asumirá, con carácter exclusivo e de acordo coas súas competencias, a contratación en materia de Tecnoloxías da Información e as Comunicacións que resulte preciso realizar para a execución deste convenio.

A prestación de novos servizos ou a ampliación dos actualmente existentes requirirá a formalización da correspondente addenda a este convenio, onde necesariamente figurarán as condicións necesarias para levalos a cabo.

Cuarta.- Compromisos do Consello de Contas de Galicia



- Colaborará e prestará a asistencia que requira a Amtega no cumprimento das obrigas establecidas neste convenio.
- Facer un uso axeitado das solucións e infraestruturas informáticas do Catálogo de sistemas dixitais postas a disposición do Consello de Contas de Galicia necesarios para o funcionamento dixital.
- Cumprir coas especificacións técnicas e condicións de uso das solucións e infraestruturas incluídas no presente convenio.

- Levar a cabo as actuacións necesarias dentro da súa Institución, no exercicio das súas competencias, para a posta en marcha das solucións e infraestruturas do presente convenio que desexen utilizar.
- Facilitar, aos órganos da Amtega, a comprobación das condicións de uso e da implementación dos requisitos técnicos necesarios das solucións e infraestruturas do presente convenio que desexen utilizar. .


Quinta.- Financiamento

As actuacións previstas no presente Convenio non xerarán custos nin darán lugar a contraprestación financeira entre as partes, e polo tanto, non precisa consignación orzamentaria.

Sexta.- Comisión de seguimento



Como mecanismo de coordinación para o adecuado desenvolvemento das actividades previstas constituirase, reuníndose sempre que sexa necesario unha comisión paritaria integrada por dous representantes da Axencia para a Modernización Tecnolóxica de Galicia e dous representantes do Consello de Contas de Galicia, que actuará como órgano de vixilancia, seguimento e control do establecido neste convenio, promovendo, se o considera adecuado, outras actuacións que poidan enriquecer o seu desenvolvemento. A composición da dita comisión será a seguinte:

- Pola Axencia para a Modernización Tecnolóxica de Galicia, a directora da Axencia para a Modernización Tecnolóxica de Galicia, ou persoa na que delegue, e a titular da dirección da Área de Modernización das Administracións Públicas, ou persoa que a substitúa.
 - Polo Consello de Contas de Galicia, a secretaria xeral, ou persoa na que delegue, e a persoa titular da xefatura de servizo de informática ou persoa que a substitúa .
- 

A comisión estará presidida pola directora da Axencia para a Modernización Tecnolóxica de Galicia.

Ao final de cada anualidade a comisión de seguimento xerará un informe de estado e cumprimento anual do obxecto do presente convenio.

Sétima.- Medios humanos e materiais

A Amtega, co obxecto de garantir a adecuada execución das actuacións deste convenio, comprométese a asumir a dirección, organización e xestión dos traballos, para o que dispón da estrutura e servizos técnicos suficientes, facéndose responsable da súa calidade técnica. A Amtega, procederá, en consecuencia á asignación de medios humanos e materiais que sexan necesarios para as indicadas funcións. Sen prexuízo da súa dirección, organización e xestión dos traballos, a Amtega poderá contratar as subministracións e os servizos externos que sexan necesarios para a súa realización material, cando non conte cos medios precisos para levala a cabo. Estes contratos someteranse sempre ao establecido na lexislación de contratos do sector público.

No caso de cesión de datos, a entidade contratada cumprirá as esixencias do Regulamento UE 679/2016 Xeral de Protección de Datos e, no que estea vixente, a Lei orgánica 15/1999, de Protección de datos, adoptándose tanto as medidas de seguridade técnicas como organizativas.

Oitava.- Duración do convenio e prórroga

Este convenio terá unha duración inicial de catro anos, dende a data da súa sinatura, sen prexuízo da súa prórroga anual ata un máximo de catro anos adicionais a súa duración inicial.

Novena.- Resolución

O presente convenio resolverase:

- Polo incumprimento total ou parcial dalgunha das estipulacións que o regulan.

- Polo transcurso do tempo estipulado sen que se culminen as actividades acordadas.
- Pola denuncia unilateral de calquera das partes previa comunicación á outra parte con tres meses de antelación.

Décima.- Modificación

Este convenio poderá ser modificado por acordo das partes, a través da formalización da correspondente addenda.

Undécima.- Protección de datos

En aplicación deste convenio respectaranse cantas esixencias establece o Regulamento UE 679/2016 Xeral de Protección de Datos e, no que estea vixente, a Lei orgánica 15/1999, de Protección de datos, adoptando cantas medidas resulten necesarias para cumprir as súas previsións e, en particular, para garantir a seguridade e integridade dos datos e a súa protección fronte alteracións, perdas, tratamentos ou accesos non autorizados.

Serán de aplicación todos os dereitos e obrigas derivados da normativa aplicable en materia de protección de datos.

Décimo segunda.- Inexistencia de relación laboral

A subscrición do presente convenio non implicará relación laboral, contractual ou de calquera outro tipo entre os profesionais da Amtega que realicen as actividades obxecto deste convenio e o Consello de Contas de Galicia.

Décimo terceira.- Natureza do convenio e resolución de conflitos

Este convenio de colaboración ten natureza administrativa, e os seus efectos rexeranse polo establecido nas súas estipulacións e aplicando a Lei 40/2015, do 1 de outubro, de Réxime Xurídico do Sector Público. Queda excluído do ámbito de aplicación da Lei 9/2017, de 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo

e do Consello 2014/23/UE e 2014/24/UE, de 26 de febreiro de 2014, e rexeráse polas súas propias cláusulas e, de forma supletoria, polas normas xerais do dereito administrativo.

As cuestións litixiosas que poidan xurdir na aplicación ou interpretación deste convenio, e que non poidan ser dirimidas pola Comisión de seguimento, serán de coñecemento e competencia da orde xurisdiccional do contencioso-administrativo.

Décimo cuarta.- Publicidade e inscrición en rexistros

O convenio será obxecto de publicidade e inscrición de conformidade co disposto no artigo 15 da Lei 1/2016, do 18 de xaneiro, e o Decreto 126/2006, do 20 de xullo, polo que se regula o Rexistro de Convenios da Xunta de Galicia.

As partes asinantes consenten na publicación dos datos persoais e o resto das especificacións contidas no mesmo no Portal de Transparencia e Bo Goberno da Xunta de Galicia e no Portal de Transparencia do Consello de Contas de Galicia.

En proba de conformidade, asínase este convenio de colaboración en exemplar triplicado no lugar e data indicado no encabezamento.

**O Conselleiro maior do Consello de
Contas de Galicia**



Consello de Contas de Galicia
CONSELLEIRO MAIOR

José A. Redondo López

**A Directora da Axencia para a
Modernización Tecnolóxica de
Galicia**



Mª del Mar Pereira Álvarez

ANEXO I

CATÁLOGO DE SISTEMAS DIXITAIS

Chave365

Chave365 é o sistema que permite aos cidadáns maiores de idade identificarse e asinar documentos na sede electrónica do Consello de Contas de Galicia sen necesidade de usar certificados dixitais nin DNI electrónico. Con Chave365, a persoa usuaria identificarase co seu NIF e a súa clave persoal, e poderá asinar electronicamente cun código, único para cada operación, o cal recibirá no seu teléfono móbil.

Validación de certificados

O proceso de validación de certificados permite verificar a validez do certificado (calquera dos admitidos pola sede electrónica), ou certificados, empregados para asinar un documento. Os certificados admitidos son todos os certificados validados pola plataforma [@firma](#) da Administración Xeral do Estado.

Selado de tempo

O servizo de Selado de Tempos ten como obxectivo funcional a realización de operacións de selado de tempos segundo o estándar RFC 3161, que garante de forma legal e inequívoca que o documento non foi alterado dende o momento do seu selado.

Plataforma de contratos de Galicia

Emprego do perfil do contratante existente na plataforma de contratos de Galicia que integra toda a licitación da Comunidade Autónoma de Galicia, en cumprimento da Disposición adicional terceira da Lei 20/2013, de 9 de decembro, de unidade de mercado que indica que deben estar interconectadas todas as plataformas de contratación.

Sistema de notificacións electrónicas de Galicia (notifica.gal)

O Sistema de notificacións electrónicas de Galicia, accesible a través de <https://notifica.xunta.gal>, e regulado na Lei 2/2017, do 8 de febreiro, de medidas fiscais, administrativas e de organización, permite o envío a cidadáns, empresas e administracións públicas recibir as notificacións electrónicas enviadas polas administracións galegas adheridas a este sistema.



Consello de Contas de Galicia
CONSELLEIRO MAIOR

